

**Utoqqalinermi siusinaartumillu pensionisiat allanik isertitaqarnerit nassatarisaannik annikillineqartarunnaarnissaasa kinguneqaataannik pillugit Naalackersuisut kingusinnerpaamik UPA2021-mi nassuiaammik saqqummiussinissaannik peqquneqarnissaat pillugu Inatsisartuni aalajangiiffigisassatut siunnersuut.**  
(Inatsisartunut ilaasortaq Siverth K. Heilmann, Atassut)

### **Akissuteqaat**

(Peqqissutsimut, Isumaginninnermut Inatsisinillu Atuutsitsinnermut Naalaackersuisoq)

### **Aappassaaneerpeqarnera**

Aalajangiiffigisassatut siunnersuutip massuma sukumiisumik suliarineqarsimaneranut Naalackersuisut Ilaqutariinnermut Peqqissutsimullu Ataatsimiititaliaq qutsavigiumavaat.

Isumaliutissiissut Naalackersuisut ima paasivaat, Ilaqutariinnermut Peqqissutsimullu Ataatsimiititaliap siunnersuutip itigartitsissutigineqarnissaa kissaatigigaat, siunnersuutigineqartutut nalunaarusiaq aallartinneqassappat saniatigullu siusinaartumik pensionisiaqartitsisarnerup aqqissuuteqqinneqarnerata nalilersuiffigineqarnera ingerlanneqarluni kiisalu inatsisissatut siunnersuutip kingunissaasa nalilersuiffigineqarnissaanik pilersaaruteqarneq, kingulleq uani ukiakkut ataatsimiinnermi imm. 144-usoq, taaneqartut ataatsikkut suliarineqassappata marloqiusamik sulisoqarnissaa itigartitsinissamik kissaateqarnermut peqqutigineqartoq.

Siusinaartumik pensionisiaqartut suliffittaarnissamik kajumissuseqarnerat massakkut annikilliertitsisarnermut killiliussap qanoq sunnertarneraa, siusinaartumik pensionisiaqartitsisarnermik aqqissuusseqqinnerup nalilersuiffigineqarnerani ilaatigut misissorneqassaaq. Taamaammat siunnersuummi nalilersuinissap imarisassaanut kissaatigineqartut aamma massakkut annikilliertitsisarnermut ilusililiussap kingunerisai pillugit nalunaarusiassap imai assigiissuteqassapput. Taamaattoq, annikilliertitsisarnermik unitsitsineq pillugu imaluunniit nunatta karsianut tunniussaqaarnerusinnaanerup inummut kingunissai pillugit aningaasartuutaasussatut naatsorsuutigineqartut pillugit misissuinnermik nalilersuineq imaqaangilaq. Ukiakkut ataatsimiinnermi matumani nalilersuineq tunniunneqareertussaavoq, taamaammat ataatsimiititaliap isumaliutissiissummi matumani misissorneqartussatut siunnersuutai tamaasa Naalackersuisut nalilersuinnermi ilanngussinnaangilaat. Annikilliertuartaartitsisarnermut ilusililiussap allanngortinneqarnissaanik pisariaqartitsisoqarnerisooq nalilersuinnermi erseqqissarneqarsinnaassaaq, matumani annikilliliisarnerup millisinneqarnissaanik pisariaqartitsineq ilanngullugu.

Inatsisissatut siunnersuutip siunissami nalilersorneqartarnissaa, uani ukiakkut ataatsimiinnermi imm. 144-itut oqaluuserineqartussaasoq, inatsisip allanngortinnerata atuutilerneranit ukiut 3 qaangiutereerneranni pisussatut naatsorsuutigineqarpoq. Isumaliutissiissummi massumani misissorneqartussatut erseqqissarneqartut nalilersuinnermi ilanngunneqarnissaat tulluurtuussaaq. Ukiut 3 qaangiuppata annikillitsisarnerup millineqarneranut atasumik sulilersarnermut sunniutigineqartut pillugit misissuueqqissaarnissamut periarfissiisunik paasisutissanik Naalackersuisut peqalersimassapput.

Taamaalilluni isumaliutissiissummi massumani misissugassatut erseqqissaatigineqartut pillugit Naalakkersuisut pitsaanerungaartumik akissutissaqartitsissapput. Tamakku pissutigalugit misissugassatut taaneqartut tusaatissatut tiguneqassasut siunissamilu siusinaartumik pensionisiaqartitsisarneq pillugu inatsimmut allannguutip nalilersuiffigineqarneranut ilaassasut Naalakkersuisut inassutigaat.

Ataatsimiititaliap itigartitsisoqarnissaanik innersuussinera Naalakkersuisut ilalerpaat.